

Innarluutillit kiffartuunneqarnerisa ineriartortinneqarnissaanut aamma annertusarneqarnissaanut suliniuteqalernissaq siunertaralugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq, Hans Peter Poulsen, Siumut)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Suliassaqarfiup ukiuni aggersuni Naalakkersuisunit pingaartinneqartorujussuusup siunnersuuteqartup qitiutitsineranut qujanaq.

”Pissutsini eqqortuni innarluuteqarnerit tamarmik iluaqutitaqarput. Taamaangippat iluaqutissartaanik nassaassajunnarsivunga”. Taamatut ADHD Kalallit Nunaani siulittaasoq oqarpoq. Issuaanikkut Naalakkersuisut siunissami innarluutillit pillugit politikianik nassuiaatinit allanit takinersuarnit pitsaanerusumik tunngavissiisoqarpoq. Naalakkersuisummi aallaaviat tassaagami innarluuteqarneq tamakkiisuunngitsoq. Innarluummik qanoq isiginnittariaaserput pineqarpoq.

Innarluuteqarnermi iluaqutissartaat nanissavavut. Inuit qanoq pisinnaanerat isiginiartussaavavut, innarluuteqarpata innarluuteqanngikkaluarpataluunniit. Inuit innarluutillit isumassorneqarnissaannik ineriartortitsinermik suliaqarnissat pillugit oqallinnerit aallartinneqassasut siunnersuuteqartoq siunnersuuteqarpoq. Naalakkersuisut suliamik tamatuminnaga suliaqaruttulerput. Inatsisartut inuit innarluutillit isumassorneqarnissat pillugu tunngaviusumik aalajangeererput, tassa NP Innarluutillit pillugit isumaqatigiissutinik malinninnissaq pillugu iliuusissatut pilersaarusiortoqarnissaa aalajangiunneqarmat.

Iliuusissatut pilersaarut 2023-imi saqqummersinneqassaaq aammalu inuit innarluutillit amerlanerit sulilernissaannik, ilinniagaqalernissaannik inuttullu allatulli innarluuteqanngitsutut sunngiffimmi sammisassanukartarnissaannik kinguneqassaaq. Naatsumik oqaatigalugu pilersaarut meeqqat, inuusuttut utoqqaallu innarluutillit inuiaqatigiinnut akuutinneqarnerulernerannik kinguneqassaaq. Tamanna anguniagassatigut qulingiluaasutigut tigussaasutigut peqqissutsimiit, ineqarnermut peqatigiiffilerinermillu tunngasutigut pissaaq. Katillugit Naalakkersuisoqarfiit tallimat, Aqutsisoqarfiit marluit kommunillu tallimaasut tamarmik pilersaarusiornermut peqataapput.

Tassa imaappoq aallartilluareersutut kisiannili suli amerlanerusunik suleqateqartariaqarpugut. Oqaasermi innarluut Isumaginninnermi suliassaninnaanniit imartunerujussuummat. Innarluuteqarluni inuuneq siullertut pingaarnertullu inuuneruvoq. Inuuneq inuppassuit atuariartorfigisartagaat suliarorfigisartagaallu, kaffisoriartorfigisartagaat, assammik arsariartorfigisartagaat, filmeriartarfigisaat kalaalimineerniarfigisartagaallu. Allatut oqaatigalugu: inuuneq inuit innarluuteqanngitsut tikittagaannut kikkut tamarmik tikittagaat. Taamaattumik Naalakkersuisut immikkut ittunik innarluutilinnik aamma sullissiviliorusunngillat.

Taamaattoqassappat innarluutillit sumiiffinnut allanit tikinneqarneq ajortunut innersuunneqartarnerannik kinguneqassaaq. Taamatut ingerlasimaneq naammaleqaaq. Taarsiullugu inuiaqatigiit peqataaffigeriikkatta inunnik innarluutilinnik inissaqartitsisarnissaat Naalakkersuisut sulissutiginiarpaat. Tassa ilaatigut oqartoqarsinnaavoq Kulturikkut Illorsuit

pioreersut nutaassallu inunnit innarluutilinnit aamma iserfigineqarsinnaanngorlugit aaqqissuunneqassasut.

Taamatut oqartoqareermat innarluutillit pillugit suliassaqarfinnut tunngatillugit kommunit tunngavissinneqarnissaat Naalakkersuisut sulissutigaaat. Sisimiuni Pissassarfik innarluutilinnik sullissiviuvoq nutaaliaq atuuffinnillu siunnersuuteqartup oqaatigisaanik tunngavissisinnaasoq. Pissassarfik sulisunik pikkorissunik suleqataalluurtunillu inoqatitsinnillu inoqatinik pitsaasumik isiginninnermik saniatigut allanik piginnaaneqanngitsunit isumaginnittunik piginnaanngorsaanernut ilaatigut ikiuussinnaavoq. Pissassarfiup aamma inuit innarluutillit innarluuteqarlutik pitsaasumik inuuneqarnissamat ilinniarnissaannut ikiortarpai. Immikkut ittumik piginnaanerilikkat tamakku nuna tamakkerlugu innarluutilinnik sullissivinnut kommunit neqeroorutaannik tungavissisinnaasunut innuttaaqatitsinnillu innarluutilinnik tapersersuinermi pingaarnepaasunut katersorneqarnissaat pingaaruteqartoq Naalakkersuisut isumaqarput. Suleqatigiinneq pitsaanerulersinnaavoq taamaattumillu kommunit suliassaqarfimmi sunik pisariaqartitsinersut Naalakkersuisut tusarusooqaaat. Innuttaasut pisariaqartitaat apequtaaginnarpoq. Tamatumunnga atatillugu Kommunit innarluutillit pillugit siunnersuisoqatigiivi oqalliffiuvoq pingaarutilik innuttaasut innarluutillit tusarneqarsinnaaffiat. Naak najukkani unamminartuugaluartoq kommunit amerlanerit innarluutillit pillugit siunnersuisoqatigiinnik pilersitsiortulerlutillu ingerlatsilereerput. Tamanna ineriartorneq pitsaasuvoq, siunissami innarluutillit ikorfartorneqarneri innuttaasut pisariaqartitaannut qulakkeerinnittoq.

Pisariaqartitat annertupput, soorlu siunnersuuteqartup uparuaraa inuiaqatigiisugut sutigut tamatigut peqataanerulernissatsinnut alloriartariaqartugut. 2021-mi innuttaasut saaffiginnittarnerisa amerlassusiat Tilioq-mi naatsorsorneqarmat suliassaqarfik tamanna pingaarnersaatinneqarniartariaqartoq paasinarsivoq. Taamaattumik suliassaq Inatsisartut saqummiussimamassuk Naalakkersuisut nuannaarutigaaat siunissamilu suliassaqarfup pingaarnersiuffigineqarnissaanut isumaqataallutik.

Taamaallutik Naalakkersuisut taamatut oqaaseqarsinnaanerminnut qujavugut oqallilluarnissasinnillu kissaallusi.